

Tik- en trommelsyndroom

n verhoal ien t Grunnegers deur Bé Kuipers

As lutje potje schien ik vrouger aal laankdurig tegen t voutenend van t ledikantje trapt te hebben, volgens overlevern. k Was der din wel zulf bie, mor ik wait ter niks meer van. Wat ik zulf nog wel hail goud wait is dat ik mien olders zo'n beetje stoabelgek moakt heb mit mien trommelderij, dou ik n opkommende puber was. t Was ien t lest van fiefteger joaren van veurege aiw, ik zat op LTS ien Stad en learde van n poar klasgenoten holten tromstokken moaken, bie timmeren. Dij jonges zaten op n drumband en rovvelden de haile dag mit dij stokken overaal op. En dat wol ik ook! Zai leerden mie wat van heur tromeitaimkes en foefkes en ik bedocht ter zulf ook vanales bie. k Heb mie tromeitn zotrekend zulf aanleerd.

Aanstoken deur dizze jonges heb ik as puber t haile hoes onvaailig moakt deur werkelijk overaal op te tromeitn en te rabbeln mit mien zulfmoakte stokken. Loader heb ik mie op aandringen van mien olders (t zol ja helpen en beder veur mie, mor ook veur heur wezen) bie de ploatselke fanfare, muziekverainen 'Concordia en Omstreken' anmeld, mit as gevolg dat ik n echte trom ien bruiklain kreeg. t Geluud van dij trom oversteeg dat van stokken op deuskes en plankjes vanzulf enorm en ie zellen begriepen dat nou ook ons bureen haildaal gek werden van mien rovvelderij, ja haile stroat haar ter over.

Behaalve dat ik veur fanfare en drumband oefen mos, traande ik ook veur de joarlekse meziek-mirreg op ambachtschoul. Ik speulde doar mit n schoulvrund soamen. Hai speulde op zien harmonikoa 'Schneewalzer' en 'Alte Kameraden'. Ik begelaaidde hom mit n grote drumbandtrom en dikke holten stokken. t Was nait om aan te heuren en ook gain gezicht. Mor ja, wie waren dikke pubers... Nóg ken ik snaachts zwaitend wakker worden as ik weer dreumd heb over dat optreden.

Oetaindelk bin ik, besmeurd mit pek en veren, deur mien buurtgenoten t dörp oetjagd, zo zat waren ze van mien getrommel. Gelukkig kon ik gaauwachteg ien Stad n koamer krieggen en doar sloot ik mie noa n zetje aan bie wat ien joaren zesteg n 'beatband' haitte, mit de waainig originele noam 'The Strings'. Wie speulden top-vaddegnommers ien rokerge cafés, dörpshoezen en gimmetieklokoalen. Mor de fanfare bleef ik ook doun. Eerst en veuraal lutje trom, loader drumstel en nog loader pauken. Ik haar ter slim drok mit en leefde mie der haildaal mit oet.

Mor dou ik traauwde heb ik de fanfare en de band van aine dag op aander ien ainmoal opzegd. Ik hong mien tromstokken zo te zeggen aan de wilgen. Der mos sproake wezen van n min of meer normoal huwelijksleven, von ik dou. Ik dee t oet goud best, mor achterof haar ik nooit ale schepen achter mie verbranden mouten. Mor ja, achterof... t Brook mie din ook slim op.

Bie gebrek aan n drumstel, ja zulfs aan tromstokken, heb ik noa n joarofwat n soort van vinger-tromeitn ontwikkeld, doaraan ik te pas - en veul voaker te onpas - oeting gaaf op toavels, stoulleunens, kasten, kouk-, brood- en koffietromkes, deuzen, blikjes, bakjes, potten en pannen, deuren en roamen, t aanrecht, fietsbel, ja woar nait op. t Bloud kropt ja doar t nait goan ken. Ik kon dou, en nou nóg traauwens, mit vingers van baaide handen zo'n beetje ale ritmes en tromeitklanken noabootsen en as ik ook mien vouten derien betrok, ien combinoatsie mit sis- en snoefgeluden, leek t net n echt drumstel. De haile dag deur tromeitde ik op zo'n me-naaier overaal op. Ie kennen wel noagoan dat zukswat grode spannens gaaf ien t gezin en ook onze vrundenkring wer aal klaainer. Ien cafés, bioscopen en aander openboare gelegenheden wollen ze mie nait meer hebben.

Ie mouten goud begriepen dat dit veur miezulf ook n liedensweg was, te leven mit n naagen, feidelk n nait te onderdrukken manie, n versloaven of wat ook aan tromeitn, inclusief de moatschoppelke gevolgen. Ik tromeitde letterlijk aan de lopende baand op ales wat mor n

beetje hol klonk. Mien vraauw en kiender begonnen der onder te lieden en op heur beurt ook onaangepast gedrag te verteunen. Mor feidelk ken ik ter niks aan doun. Der is n steekje lös bie mie, ien hazzens. Ik mis n stofke, zee dokter. En doar krieg ik nou ale doagen n tabletje veur. Wat n zegen! Zodounde denk ik dat ik dij manie, dij naaigen tot trommeln, op t mement oardeg schier onder controle heb om ongelukken ien toukomst te veurkommen.

Doarnoast heb ik n landelke verainen opricht van en veur lieders aan dit tik- en trommelsyndroom, dij ik 'Tremolo' nuimd heb en doarvan ik aalgemain siktoares-generoal en puutholder bin. Ons ledenbestand is jammergenog stoeken bleven bie twij. Mien zeun, dij t syndroom van mie overaard het, en ikzulf. Meschain dat ik nog te waainig publiciteit zöcht heb, of dat aander lieders heur nog teveul stiekem oetleven en heur aal trommelnd nait ien de openboarheid vertonen durven. Der rust noamelk n enorm taboe op. Mor meschain ook dat doar nou veraandern ien komt. Ik roup doarom alle trommellieders op noar boeten te treden en lid van mien verainen te worden. Komt oet kaast, nait baang wezen, weest joe van joen öfwieken bewust! Komt der veur oet! Contributie is leeg en noar draagkracht.

Overgens geef ik ook regelmoateg lezings over dit syndroom en noa pauze geef ik din voak haile interessante demonstratoatsies vingertrommeln. Ik demonstreer din twij en drij vershilnde ritmes touglicks en ik heb doarbie n iendrukwekkend voutenwaark ontwikkeld. Succesvolle veurstellings heb ik aal geven veur Plattelandsvraawen van Wierumerschaauw, buurtverainen van Westerdiekshörn en olderverainen van 'School met de Bijbel' ien Onderwierum.

Dij leste bieainkomst was zodoaneg succesvol, dat ik toch weer haildaal ien n trommelroes terecht kwam en nog doagen noatied op alles wat lös en vaast zat ien ons hoes trommelde en roatelde. t Is n fiene juvver mit mie, t ken zo mor weer mis wezen. Meschain haar ik ook wel mien tabletje vergeten... Dokter het mie n spuitje geven en zo bin ik weer tot miezulf kommen.

Ik zing nou ien n koor dij langsoame, ritmeloze en ainstemmege sloaplaidjes oet Middelaiwen zingt. t Voldut mie geweldeg, mor wie hebben nog van gainain n nuigen veur n concert kregen. En nije leden krieg we ook hoast nait... Dus, leesders, heb ie ook last van dit syndroom, en hol ie ook van zingen, geeft joe op bie mie. Der is licht aan t èn van tunnel!